

摛藻堂四庫全書薈要

集部

欽定四庫全書
薈要卷一萬五千五百二十三

集部

劍南詩橐卷三十三

宋 陸游 撰

立秋後四日雨

天為新秋故作涼海風吹雨入虛堂涼生庭樹陰陰綠潤襲篝衣浥浥香杯泛鵝兒供小歎碓春雲子喜新嘗一年又見星橋近未信仙家日月長

夙興

老眼無眠覺夜長攬衣不復待窗光明星漸淡避初日
秋露已濃生曉涼出艸幽花紅紫雜穿林啼鳥去來忙
是中有趣君知否喧寂年來已兩忘

存養堂為汪叔潛作

絳帳先生見處別少年立節如冰雪胷中凜凜萬卷書
一字不為庸人說存心養性以事天人知不知渠晏然
窮經日夜廢寢飯不怕諸生嘲腹便三旌五鼎俱忘想
致一工夫在存養我今老病死即休未死尚欲從公講

感昔

三著朝冠入上都
黃封頻醉渴相如
馬慵立仗寧辭斥
蘭偶當門敢怨鋤
富貴尚思還此笏
衰殘故合愛吾廬
燈前目力依然在
且盡山房萬卷書

又

五丈原頭秋色新
當時許國欲忘身
長安之西過萬里
北斗以南惟一人
往事已如遼海鶴
餘年空羨葛天民
腰間白羽凋零盡
却照清溪整角巾

病稍平示兒輩

人與鴉俱曉天憑雁送秋極知生意盡彊為汝曹留藥
餌傾殘橐風霜迫故裘倚屏搔短髮且復寄悠悠

野堂

野堂蕭颯雪侵冠歷盡人間行路難病馬不收煙艸暝
孤桐半落井牀寒長瓶濁酒猶堪醉敗篋殘編更細看
此興不隨年共老未容城角動憂端

又

姓名無復世人聞
靜處何妨獨策勲
久矣不堪東閣客
歸哉無媿北山文
橫林霜近有丹葉
平野雨餘多斷雲
更喜鷓鴣來漸熟
一溪煙水與中分

又

野堂地僻無車馬
艸徑柴門晝亦扃
栗里雖貧儲舊粟
玉川終老抱遺經
病身凜凜殘秋葉
故友寥寥欲旦星
賴有吾兒堪暖眼
夜闌常共一燈青

又

鼓缶酣歌樂太平野堂窗戶極疎明棄官正為愚無用
謝客新緣病有名閒入鄉人賽神社時從長者放魚行
驩然更有關心處打稻家家趁晚晴

七月下旬得疾不能出戶者十有八日病起有賦
秋風吹海氣氣候頗不令昏昏七十翁擾擾半月病著
書殊未成即死目不瞑扶持賴藥物僅得全性命雨添
苔暉青風入桐枝勁深巷無人聲撫頤發孤詠

夢有餉地黃者味甘如蜜戲作數語記之

有客餉珍艸發奩驚絕竒正爾取嚼乾炮製不暇施異
香透崑崙清水生玉池至味不可名何止甘如飴兒稚
喜語翁雪領生黑絲老病失所在便欲棄杖馳晨雞喚
夢覺齒頰餘甘滋寄聲山中友安用求金芝

秋夜

燈欲殘時酒半消斷磈疎雨共無憊老來萬事渾非昔
惟有詩情似灞橋

又

夜雨淒涼客思迷
間堪却是夢回時
人人解說悲秋事
不似詩人徹底知

病起憊甚有歎

殘年迫衰謝
一病不枝梧
書倩傍人讀
行須稚子扶
冥心付天地
畢世釣江湖
無米博佳傳
虛名那可圖

小舟晚歸

扶病尋溪友
忘憂泛釣槎
渚寒無宿鷺
月白有啼鴉
敗壁青燈暗
幽窗稚子譁
無生未暇說
且復議桑麻

又

秋晚吾廬好柴門映斷山潮生魚箔短木落雉媒閒繚
堞蒼茫外漁舟浩蕩間客來常謝病老鈍耐嘲訕

夜坐

老眼清無寐孤懷默自傷思人交舊盡撫事歲時長籬
犬吠殘月江楓凋早霜放翁殊耐事掩卷撥爐香

幽事

老夫病起日支離幽事關心只自知社近鄰翁餽新釀

客歸童子拾殘暴功名已付來生了筆墨尤非晚歲宜

餘習可憐除未盡移花引水伴兒嬉

病後衰甚非籃輿不能出門感歎有賦

酒興詩情尚自如形骸可怪頓成疎平生只倚雙鳬鳥
此日常須一鹿車寂寂豈惟慙鄧禹厭厭更覺類曹蜍
晚窗弄筆聊湔祓數首清詩手自書

秋思

人生四十歎頭顛久矣心知負壯圖未死皆為閒日月

無求儘有醉工夫風凋木葉流年晚秋入窗扉病骨蘇
信步出門湖萬頃季鷹不用憶蓴鱸

題村店壁

五十年來命壓頭即今殘髮不禁愁亂鴉陣起霜天晚
落葉聲乾古渡秋小市歌醻聊兀傲長亭秣蹇得遲留
一身自處窮如許幸是無因為國謀

病去

病去身差健秋高氣漸寒未甘常伏几時作一憑闌玉

粒炊粳軟香塵搗藥殘欣然顧兒輩燈下語團欒

白首

白首稱祠吏清時作辛民招呼林下客遊戲夢中身山路烏騃穩煙波畫檝新村村有花柳無事即尋春

書病

乙卯七月二十二日卧病兩旬始平九月二日作此詩

算年雖病不甚劇啜藥歟粥猶自力今年七月風眩作兒子在前不能識杯中藥冷呼不醒全家相顧無人色昏昏但思向壁卧蟲臂鼠肝寧暇恤醫巫技殫欲歛手

天高鬼惡吁莫測偶然得活出野外扶杖下牀猶屢踣
讀書心在目力短袖手堅坐到窗黑無功祿食四十年
歎息此責何由塞

舍北晚眺

紅樹青林帶算煙竝橋常有賣魚船樊川詩句營丘畫
盡在先生拄杖邊

又

日日津頭繫小舟老人自嬾出門遊一枝筇杖疎籬外

占斷千巖萬壑秋

夜閱篋中書偶得李德遠數帖因思昔相從時所
言後多可驗感歎有作

早歲傳聞月旦評殿門邂逅眼偏明當時一坐推談止
今日叢林見話行老卧煙村身偶在夜開蠹紙淚如傾
豈知三十餘年後河洛風塵訖未平予送德遠歸臨川
詩有旰食煩明主

風沙暗舊京之句頗為前輩所稱時紹興辛巳春也

登東山

漆園傲吏養生主栗里高人歸去來俱作放翁新受用
不妨平地脫塵埃松崖壁立臨樵塢竹徑蛇蟠上歛臺
送盡夕陽山更好與君踏月浩歌回

貧樂

蕭然曲肱地自號直心翁

淨名書云直
心是道場

拙宦三災過勞

生一笑空新蔬經雨綠晚稻得霜紅飽食真無事浩歌

明月中

乙卯重九

九日村醅熟逢迎不用呼樽前狂起舞陌上醉相扶殘
髮新霜白衰顏落葉枯明年何足問且復挿茱萸

縱步近村

病去身輕試杖藜滿村麴麥正離離照溪自歎尚微瘦
趁渡人言殊未衰艸塞瓶頭沽濁酒花參笠頂引羣兒
裴回不恨歸差晚正愛青燈映竹籬

題齋壁

看盡人間利與名歸來始覺此身輕禍機不敗漁舟興

樂事渾輸地碓聲破篋雖無衣可典寒畦已有芋堪烹
餘年且健貧何害剝與鄰翁醉太平

范參政挽詞

屢出專戎閩遄歸上政途勲勞高汗馬風采震飛狐籤
帙新藏富園林勝事殊知公儂去日遺恨一毫無

又

孤拙知心少平生僅數公凋零遂無幾遲算與誰同瓊
樹世塵外神山雲海中夢魂寧復接慟哭向西風

病後往來湖山間戲書

周公居東三食新夷吾在魯丘尼陳聖賢憂患尚如此
況我本是羈窮人今秋危病輒不死餘業自笑堅頑身
結茅所幸得佳處石帆天鏡無纖塵捫蘿峭壁上采藥
腰斧長歌行負薪尋僧獨泛若耶月攜友共采湘湖蓴
蠡亡範金陋勾踐斯頌刻石憎嬴秦不如一醉禹祠去

惡衣菲食真吾鄰

禹祠在吾廬
東南十餘里

秋夜遣懷

六年歸卧水雲鄉本自無閒可得忙羸病豈知身尚健
透疎真與世相忘霜清水落年華晚月黑梟鳴夜漏長
瑣瑣井畦何足計一篇秋水笑蒙莊

初冬暄甚

吳中十月雪霜慳風景暄妍葉未殷杲日還看浴東海
薄雲不解冒南山蛙鳴閣閣荒池曲蟠出營營食案間
安得玄冥正時令紅爐綠酒一開顏

贈湖上父老十八韻

一鏡三百里環以碧玉峯天公賜我厚極目為提封煙
收見石帆雨霽望卧龍嵯峨寶林墻迢遞天章鍾興來
思一出霜晴及初冬父老捨杖迎衣冠頗嚴恭語我相
識久幸未棄老農間者傳伏枕喜聞足音跕貧舍有盤
食勿責異味重餽麌新油香黍酒甕面濃已遣買撲握
亦可致喫喟願公領此意秣蹇聊從容我起為太息厚
意敢不從吾生行逆境平地九折邛況今又老退如子
豈易逢但願從今健衰疾緩見攻遇興卽扣門艸具煩

炊春但恐棄月來妨子睡味濃

初冬感懷

落葉掃還積斷鴻飛更嗚羸軀得霜健老眼向書明水
瘦河聲壯其枯馬力生竟為農父死白首負功名

又

庭蕪失故綠園樹染新丹病思閒支枕詩情獨倚闌帶
移頻覺瘦貂弊不禁寒惟有牆陰薜離離又滿盤

讀杜詩

城南杜五少不羈意輕造物呼作兒一門酣法到孫子
熟視嚴武名挺之看渠胷次隘宇宙惜哉千萬不一施
空回英槩入筆墨生民清廟非唐詩向令天開太宗業
馬周遇合非公誰後世但作詩人看使我撫几空嗟咨
記九月三十日夜半夢

一夢邯鄲亦壯哉沙堤金轡絡龍媒兩行画戟森朱戶
十丈平橋夾綠槐東閣羣英鳴珮集北庭大戰捷旗來
太平事業方施設誰遣晨雞苦喚回

小舟遊近村捨舟步歸

數家茅屋自成村地碓聲中晝掩門寒日欲沉蒼霧合
人間隨處有桃源

又

借得漁船汎小谿繫船浦口却扶藜莫言村落蕭條甚
也勝京塵沒馬蹄

又

不識如何喚作愁東阡南陌且閒遊兒童共道先生醉

折得黃花挿滿頭

又

斜陽古柳趙家莊負鼓盲翁正作場死後是非誰管得
滿村聽說蔡中郎

蜀僧宗傑來乞詩三日不去作長句送之

看遍東南數十州寄船却泝蜀江秋孤雲兩角山亡恙
斗米三錢路不憂今年所在皆大稔萬里得詩長揖去它年挈
笠再來不放翁爛醉尋常事莫笑黃花挿滿頭

義農

義農去不反釋老似而非太息衆皆醉逝將誰與歸經時忘肉味盡日掩柴扉安得同心者燈前語造微

冬夜不寐

老眼睡眠少空村霜露淒錚錚聞叩鐵喔喔數鳴雞月入知窗破衾單草屋低明晨炊米盡吾起不容稽

十月

塞向傾書櫑開爐積豆萁林居得溫暖天遣養衰遲甕

盜藏蔬後鉏耰下麥時農家冬最樂我老頗能知

讀易

羸軀抱疾時時劇白髮棄衰日日增淨掃東窗讀周易
笑人投老欲依僧

又

老喜杜門常謝客病惟讀易不迎醫冬來更愧乖慵甚
醉過收蒿下麥時

聞雁

霜高木葉空月落天宇黑哀哀斷行雁來自關塞北江
湖稻梁少念汝安得食蘆深洲渚冷歲晚霰雪逼不知
重雲外何處避畢弋我窮思遠征羨汝有羽翼

悲歌行

士如天馬龍為友雲夢胷中吞八九秦皇殿上奪白璧
項羽帳中撞玉斗張綱本不問狐狸董龍何足方雞狗
風埃蹭蹬不自振寶劍牀頭作雷吼憶遇高皇識隆準
豈意孤臣空白首即今埋骨丈五墳骨會作塵心不朽

胡不為長星萬丈掃幽洲
胡不如昔人圖復九世讎封
侯廟食丈夫事齷齪生死真吾羞

村飲

吳中賈霜晚冬艸有未衰坐令老病叟遂失凋年悲翩翩
烏紗帽裊裊殘菊枝雖無車馬客時與隣翁期新醅
壓尚渾雉兔亦及時自覺勝淵明但醉不賦詩

鏡湖西南有山曰外山民某氏居之其居少西小潭受飛泉羣山環合真異境也為作短歌

漢東九十九重岡武都九十九脉泉豈如君家環翠阜
小潭珮玦聲鏘然我欲從君乞菴地開軒下看泉中天
金丹九轉太多事服水自可追飛仙雲孫相遇不相識
笑問塵世今何年掬泉美月清歎罷却折玉井秋風蓮
十月十七日予生日也孤村風雨蕭然偶得二絕

句予生淮上是日平旦大風雨駭人及予墮地雨

乃止

少傳奉詔朝京師檣船生我淮之湄宣和七年冬十月

猶是中原無事時

又

我生急雨暗淮天
出沒蛟鼉浪入船
白首功名無尺寸
茅簷還聽雨聲眠

遊山舟中遇風雨戲作

龍驤萬斛去如鴻
巨浪惟能窘短蓬
不是山靈嫌俗駕
一生常值打頭風

一齒動搖似不可復留有感

晚境常憂豁可憎苦留終不受丁寧主貧何恨客辭去
木老元知葉自零未害采頤臨肉俎但妨叩齒讀仙經
從今有酒須勤買莫學騷人要獨醒

山行

老翁七十亦何求尚賴山行散百憂懶耳帽寬新小疾
獨轆車穩正閒遊酒旗滴雨村場晚茶竈炊煙野寺秋
若論人間長久事高吟何啻傲封侯

老學菴

予取師曠老而學如東燭夜行之語名菴

東燭夜行之語名菴

窮冬短景苦恩忙老學菴中日自長名譽不如心自肯
文辭終與道相妨吾心本自同天地俗學何知弱粒糠
已與兒曹相約定勿為無益費年光

枕上偶成

放臣不復望脩門身寄江頭黃葉村酒渴喜聞疎雨滴
夢回愁對一燈昏河潼形勝寧終棄周漢規模要細論
自恨不如雲際雁南來猶得過中原

舍北閑望作六字絕句

潘岳一篇秋興李成八幅寒林舍北偶然倚杖盡見古

人用心

題菴壁

竹間僅有屋三楹

小菴纔
雨間

雖號吾廬實客亭已斷雨聲

重點滴欲殘燈影更晶熒酒惟排悶難中聖茶却名家
可作經頭眩減來還病蹇何時徹底得康寧

又

身似蝸牛麤有廬却緣無用得安居地爐封火欺寒雨

紙閣油窗見細書
麌熟山僧分餽飪
船來溪友餉新榜
閉門莫笑衰頰甚
讀易論詩亦未疎

縱筆

老眼輕千葉
枯腸却八珍
直令身潦倒
未害膽輪囷
酒裏遺浮世
書中見古人
平生笑園绮
老躅帝城塵

又

壯歲志天下
躋嶧無一施
高談對鄰父
朴學付癡兒
補衲憐雞冷
分糧憫雀饑
吾生忽至此
惆悵鏡中絲

又

天道何時定人生固有涯壯年行出塞晚歲病還家積
憤憑誰豁孤忠祗自嗟今朝茅屋底隱約聽霜笳

十月二十八日夜雞初鳴時夢與數女仙遇其一
作詩示予頗哀怨如人間語惟末句稍異予戲之
曰若無此句不可為神仙矣其一從傍戒曰汝當
勿忘此規作詩者甚有愧色予頗悔之既覺賦兩
絕句以解嘲

玉姝眉黛翠連娟美翰閒題小碧牋人世愁多無著處
故應分與葉宮仙

又

虹作飛橋蜃吐樓羣仙來賦海山秋玉姝定自多才思
更與人間替說愁

山行

緣崖曲曲羊腸路傍水疎疎鹿眼籬舉起短鞭成一笑
吾詩正是策勲時

又

眼邊處處皆新句
塵務經心苦自迷
今日偶然親拾得
亂松深處石橋西

貧甚作短歌排悶

閒何閑逢諸葛
畏人常憂不得活
事不諧問文開不蹋
權門更可哀即今白髮如霜艸
一飽茫然身已老惟有
躬耕差可為賣劒買牛悔不早年豐米賤
身獨饑今朝得米無薪炊
地上去天八萬里空自呼天天豈知

過張王行廟

烈士生不遇栖栖為旅人英魂死不沒凜凜為明神
明神受帝命廟食福我民牲酒何足言壓抑姑少伸火旱
千里赤與人下雷雨洚水不反壑談笑出平土善人錫
之福姦偽亦擊汝豈若世上人吞聲氣如縷

秋月曲

舊時家住長安城萬戶千門秋月明紫陌朱樓歌吹海
酣宴不覺銀河傾受降城頭更奇絕莽莽平沙千里月

選兵夜出打番營鐵馬蹴冰冰欲裂塞月未落成功回
腰鼓橫笛如春雷長安高樓豈不樂與此相去何遠哉
丈夫志在垂不朽漆讐骷髏持飲酒舉頭雲表飛金盤
痛飲不用思長安

卽事

蕭騷白髮滿綸巾猶是人間詩酒身湖上悲秋新有作
眼邊敗意絕無人稻梁栖畝雁初下煙水粘天鷗自馴
堪笑推移成老大時時几杖接鄉鄰

悲歌行

感慨常自悲發為窮苦辭幅仄不少伸夢中亦酸辛脂
車思遠道太息令人老中原宋輿圖今乃去故都此責
在臣子諸公其可已談笑復舊京令人憶西平

讀李泌事偶書

莘渭當時已誤來商山芝老更堪哀人生若要常無事
兩顆梨須手自喂

晨起

晨起梳頭嬾披衣立艸堂霧昏全隱樹氣暖不成霜灘
急回魚隊天低襯雁行新春猶一月已覺日微長

喜雨

一秋未雨冬未雪坐使肺肝生客熱不惟裘褐藏篋笥
卧毡坐氈俱未設樽中有酒不敢嘗小甕黃虀却時啜
新春距今一月爾便恐蝗生殘宿麥天公老手真可人
夜雨蕭蕭洗旱塵北風吹雪定不晚喜入三山湯燧碗

閒趣

堅閉門來又過冬一裘且復擁龍鍾不辭陋巷如漿冷
自愛新醅似粥釀迎婦橋邊燈煜煜賽神林外鼓鼈鼈
豈惟自得閒中趣要遣兒孫世作農

自警

人生非金石壽夭不自知一日復一日亦或至耄期方
其未死間早夜勿自欺嗟彼陷溺者太山起毫釐努力
戒惰偷堯舜可庶幾我今齒髮弊彊健復幾時一寸學
古心自視猶可為雞鳴推枕起為善亦孳孳天定終勝

人吾世或未衰素業果有傳三復吾此詩

雨後

鏡湖歸隱老黃冠布褐蕭然一室寬燈影青熒人未睡
雨聲點滴夜將闌四朝出處朋儕盡半世漂流骨相寒
青史無名端可恥著書留與後人看

又

蕭蕭殘髮雪侵冠冉冉清愁用底寬把卷昏眸常欲閉
投牀睡興却先闌惟須酒沃相如渴未分人哀范叔寒

雨霽定知梅已動佩壺明日試尋看

窗黑

風雨窗常黑衰翁罷讀書縱橫慙七略廢惰失三餘宴
坐工夫熟多聞習氣除韓公未解此誤誚腹空虛

雨止行至門外戲作

簷雨收殘滴溪雲弄晚晴出門還浩歎幾屐了吾生

野飲

綠岸波生染麴塵碧天雲細蹙魚鱗山居剝得舒長日

野飲自無拘忌人

元結詩云坐無拘
忌人勿限醉與醒

酒甕石邊孤店晚

樵風溪畔早梅春懷章正可驚奴輩未勝行歌獨負薪

雨後有懷張季長少卿

放翁雖老未忘情獨卧山村每自驚鼎鼎百年如電速
寥寥一笑抵河清梅初破藟行江路燈欲成花聽雨聲
正用此時思劇飲故交零落憶餘生

雨中熟睡至夕

擁爐聽雨生睡思澀眼瞢瞢惟欲閉丈夫少壯要自力

飽食養慵真可媿我今不睡欲何為常恐兒曹落吾事
蠻榦紙帳方施行五鼎八珍無此味

又

少陵今雨無客至寂寞衡門晝常閉孝先酣枕夢周公
弟子雖嘲可無媿世上紛紛榮辱多不如睡中差省事
小兒忽報煎茶熟起擁寒爐究餘味

憶答

憶答輕裝萬里行水郵山驛不論程屢經漢帝燒餘棧

曾宿唐家雪外城
壯志可憐成昨夢
殘年惟有事春耕
西窗忽聽空階雨
獨對青燈意未平

燈下看梅

風雨經旬怯倚闌
梅花折得就燈看
有情應寄去年別
無寐不禁清夜寒
病起搘筇幽興在
春遲載酒後期寬
籬東數樹尤奇絕
日遣蠻童候路乾

程泰之尚書挽詞

文古唐元結
經明漢仲舒
三朝八座貴
千載九丘書早

接遊從末常聞議論餘死生今永訣追恨寄聲疎

又

皆在紹興末同趨行殿門方思尋宿好忽已奉遺言誅
行曲臺議飾終明主恩高皇舊朝士今復幾人存

雨夕獨酌書感

數掩蘆藩常不開饑鴉兩兩啄青苔雨來十日未成雪
歲盡一枝初見梅池上晚行攜獨鶴燈前夜酌撥新醅
漁村老景今如許駿馬舊遊安在哉

白首

白首元無一事成朝來大笑絕冠纓花飛早已知春減
漏盡寧容更夜行蕭散且為無算飲猖狂未免不平鳴
玉關青海今安在麥野桑村送此生

客言來自上臯道中以其語作一絕

日曬霜融作淺泥酒家却在斷橋西五陵今代無豪俠
獨卧茅簷聽午雞

睡起

老怯年華速
閒知晝漏長
已回酣枕夢未過
古匝香洗面
宮眉綠開茶帶脇
方山家風味在
雖病意差彊

劍南詩橐卷三十三

謹案卷三十二第十一頁後六行布穀聲中夏令

新刊本穀訛谷今改

卷三十三第六頁前二行季鷹不用憶尊鱸刊本
鷹訛膺據晉書改

第十一頁前四行白首負功名刊本白訛止據唐

宋詩醇改



--	--	--	--	--	--	--	--	--

總校官庶吉士臣張能照
校對官庶吉士臣翟槐

謄錄貢生臣王嘉稷



欽定四庫全書叢要

集部

劍南詩藁卷三十四



詳校官助教臣謝登雋

欽定四庫全書
劍南詩稿卷三十四

集部

歲莫

宋 陸游 撰

案間官歷喜更端
鬢畔羅旛巧耐寒
節辣擣香芻臘酒
染紅綠綠簇春盤
衰容未覺餘年迫
佳日猶思一笑歡
太息兒童癡過我
鄉儺雖陋亦爭看

殘臘

破臘春先到微陰日易熏鳥聲猶寂寂木意已欣欣雲
起山分疊風生水蹙紋斷腸何處笛偏向醉中聞

又

殘臘無多日吾生又一年林塘明夕照墟落淡春煙山
色危欄角梅花綠酒邊歲時元自好老病獨悽然

一壺歌

悠悠日月沒根株常在人間醉一壺傾倒欲空還歛艷
不曾教化不曾沾

又

先生醉後卽高歌千古英雄奈我何花底一壺天所破
不曾飲盡不曾多

又

自從軒昊到隋唐幾見中原作戰場三十萬年如電掣
不曾記得不曾忘

又

恥從嶽牧立堯庭況見商周戰血腥攜得一壺閒處飲

不曾苦醉不曾醒

又

長安市上醉春風
亂挿繁花滿帽紅
看盡人間興廢事
不曾富貴不曾窮

屬疾

白頭屬疾卧丘園
藥物枝梧且僅存
月黑淺山聞鶻嘯
窗明高樹送鴉翻
讒欺薄命深消骨
憂集窮途黯斷魂
回視少時真隔世
但餘一念在元元

新歲

風入鞭梢緊春從艸色深山坡卧新犢園木轉幽禽勲
業少年夢關河遊子心爾來都掃盡濁酒帶醅斟

早春

數聲屋角聽鳴禽紅粃青稍忽滿林雨過東臯一犁潤
水消南澗半篙深逢僧竹院閒評藥攜鶴山村醉擁琴
青史功名黃閣貴有時應不到如今

太古

太古安知處與堯茹毛飲血自逍遙不須追咎為書契
初結繩時俗已澆

春夜

老憊生如寄春寒夢亦孤燈花時自墜梟語迭相呼萬
里書難得三年病未癒窗深不知曉但覺動林鳥

正月六日作

上天四序分寒燠以漸相尋不相瀆今年立春七日耳
暖景溫風何迫促羣蛙怒鳴蚊蚋出蚍蜉挿翅飛滿屋

兒童便欲覓團扇我亦汙垢思湯沐山坡梅花常恨晚
一夕開盡如雪谷離邊已放桃藥紅庭下頓長萱芽綠
小人識淺喜欲舞輕衫冷麌相追逐春深癘鬼不貸人
此暖但憂非汝福

寄題吳斗南玩芳亭

北斗以南有吳侯人物知非第二流讀書不放一字過
閉戶忽驚雙鬢秋平生離騷讀千遍屈泥秭歸要親見
歸來落筆愈驚人宋玉景差俱北面玩芳亭中蘭茝芳

朝回解帶春晝長愛君憂國有奇作坐令壯觀還沅湘
老夫曩亦同此趣甚欲閒題玩芳句無奈生涯今已別
倒壘枯楠忘歲月

春初驟暄一夕梅盡開明日大風花落成積戲作
暖逼梅花爛漫開飄零便恐付蒼苔更堪連夜風如許
似妒愁人把一杯

又

殘梅零落不禁吹真是無花空折枝堪笑老人風味減

三年不作送梅詩

予往歲多有送梅之
作今閣筆已累年

又

年年爛醉萬梅中吸酒如鯨到手空花欲過時常惜別
今年此別更怱怱

讀老子傳

巍巍闕里與天崇禮樂詩書萬世宗但說周公曾入夢
寧於老氏歎猶龍

示元用

德孫學語已驚人悶裏時時一笑新老子已應如櫂驥
此郎端恐是天麟會看神授如椽筆莫改家傳折角巾
汝叔不癡當愛汝夜窗燈火勉相親

春思

七十老翁身退耕可憐未減舊風情典衣取酒那論價
秉燭看花每到明江浦時時逢畫檝寺樓處處聽新鶯
此生無復陽關夢不怕樽前唱渭城

春望

天地回春律山川掃積陰波光迎日動柳色向人深霑
灑憂時淚飛騰滅寇心人扶上危榭未廢一長吟

丙辰上元前一日

弊裘破帽髡鬚宛似山房罷講僧身病不禁連夜雨
家貧只挂舊年燈修椽柳外掀樓角危檻雲間露墮層
自笑閒遊本無定興闌隨處倚枯藤

夜雨思括蒼遊

道心退惰如風鶴世念堅彊似火牛安得短篷湖海去

夜深聽雨琵琶洲

春陰

廻塵柳色正遮門
石黛江流曲抱村
小院春光方盜盜
遠山雨氣又昏昏
傍簷林鳥驚幽夢
極目煙蕪捲燒痕
只道餘寒尚如許
不知生意滿乾坤

寒夜歌

陸子七十猶窮人
空山度此冰雪晨
既不能挺長劒以
抉九天之雲又不能
持斗魁以回萬物之
春食不足以

活妻子化不足以行鄉鄰忍飢讀書忽白首行歌拾穗
將終身論事憤叱目若炬望古踊躍心生塵三萬里之
黃河入東海五千仞之太華磨蒼旻坐令此地沒不復
兩京宮闕悲荆榛誰施赤手驅蛇龍誰恢天網致鳳麟
君看煌煌藝祖業志士豈得空酸辛

正月十六日園中偶賦

又向柴荆過上元豪華前事不須論偶逢花發閒持酒
不得人扶嬾出門薄技號山曾獻玉榮途染指亦嘗寵

年來洗盡東陵夢瓜壟蕭蕭老故園

陵霄花

庭中青松四無鄰陵霄百尺依松身高花風墮赤玉盞

老蔓煙溼蒼龍鱗

又

古來豪傑人少知昂霄聳壑寧自期抱才委地固多矣
今我撫事心傷悲

懷舊

鶴鳴山下竹連雲鳳集城邊柳映門當日不知為客樂
如今回首却消魂

又

駿驃西過雨漫天千里江山在眼邊二十四年如昨夢
憑誰問訊帶枷僂

又

狼煙不舉羽書稀幕府相從日打圍最憶定軍山下路
亂飄紅葉滿戎衣

又

翠崖紅棧鬱參差小益初程景最奇誰向豪端收拾得
李將軍畫少陵詩

又

回龍寺壁看維摩最得曹吳筆意多風雨塵埃昏欲盡
何人更著手摩挲

又

嶓冢山頭是漢源故祠寂寞掩朱門擊鮮藉艸無窮樂

送老那知江上村

夜坐

蓬窗夜半竹騷然，坐守殘編悄不眠。
辛苦空成左傳癖，逍遙常媿大慈儻。
風寧可繫功名誤，日不能黏歲月遷。
明日覓船湖上去，西村桃李淡春煙。

入城舟中作

櫂邊蘸岸接藍水，蓬外橫空破墨山。
更著灘頭一行鷺，此身真在畫圖間。

寓蓬萊館

朱門高柳畫橋南掠面風埃喜解驂霽日偶逢春盎盎
野人不憊屋潭潭堂中剗喜簪裾集樓上時聞鼓角酣
明發扁舟覓歸路趁時吾欲事農蠶

過能仁光孝寺欲訪昕老會府中速客遂不果入
春日城南過寶坊馳驅不得駐車箱高門臨道淨如拭
傑屋凌空勢欲翔齋近鍾魚初送響風微松檜自生香
暫來堪笑忙如許坐羨高人白晝長

夜二鼓留西城門歸三山

秉炬夜離驛戴星出西關舟人飛畫櫓門鎖響銅環漁火明遙浦溪風解醉顏鄰家亦驚起迎我笑堅頑

讀杜詩

千載詩亡不復刪少陵談笑卽追還常憎晚輩言詩史
清廟生民伯仲間

蘓韜光節推挽歌詞

才名京兆掾門閥魏公孫遇事雖骯髒接人終靜溫寧

吟灞橋雪不掃舍人門二妙凋零盡衰翁慨獨存

韜光與訓

直吏部下世
相距三年

村翁

放翁真箇是村翁釣渭耕莘事不同蹴踘煙雲兩芒屨
憑陵風雪一蓬籠屢經駭浪身終免遍閱浮漚壽未窮
幸有春衣堪換酒道邊醉卧示神通

寄子布

釣灘耕壠雪盈簪從入新年病至今遠使有書常灑淚

長宵無夢更傷心何由老眼迎歸櫂空為秋風感算堪
一紙新詩千萬恨臨風悵望獨長吟

落花

朱朱白白不禁吹老未忘情作許悲瑞錦已殘猶有夢
明霞初散可無詩人應偷樣傳圖本天亦收香付蜜脾
榮悴相尋君看取曉來青子已團枝

南窗

身輕婚嫁畢耳靜市朝疎襯帶脫烏幘一窗寬有餘

排悶

白髮無端日日新
自憐猶作百憂身
孤燈聽雨常終夜
一榦尋花又送春
旋壓麥餅邀父老
時分菜把餉比鄰
不須頻起陳人歎
已是清朝六世民

過隣家戲作

老脫朝冠岸幅巾
時時乘興過比隣
餅無儲粟吾猶樂
步有新船子豈貧
醅甕香浮花露熟藥
欄土潤玉芝新
王芝謂鬼臼
山家多有之
相從覓笑真當勉
又過浮生一歲春

看花

好樹典衣買新花扶杖看村醪雜清濁山果半甘酸家事貧尤簡詩情老未闌鷓鴣閒似我日算立清灘

閒趣

同儕零落曉星稀久住人間豈自期衰病已成垂白叟春寒又到牡丹時溪邊喚客閒持釣燈下留僧共覆棋一日轉頭還過却紛紛世事不須知

春盡遣懷

裊裊爐香晝掩扉殘年真是解塵纏青磁旋擣通隣好

白葛新裁製暑衣避日小魚穿藻去倚風輕燕拂簾飛

要知名宦非初意三十年前已念歸

予以乾道乙酉卜
築湖上今三十有

二年

矣

二友

清芬六出水梔子堅瘦九節石菖蒲放翁閉門得二友

千古夷齊今豈無

半丈紅盛開

滿酌吳中清若空共賞池邊半丈紅老子通神誰得似
短筇到處卽春風

感事

雞犬相聞三萬里遷都豈不有關中廣陵南幸雄圖盡
淚眼山河夕照紅

又

堂堂韓岳兩驍將駕馭可使復中原廟謀尚出王導下
顧用金陵為北門

又

渭上晝昏吹戰塵
橫戈慷慨欲忘身
東歸却作漁村老
自誤青春不忍人

又

搊蟲當時頗自奇
功名遠付十年期
酒澆不下胃中恨
吐向青天未必知

豐年行

南村北村春雨晴
東家西家地碓聲
稻陂正滿綠針密

麥隴無際黃雲平前年穀與金同價家家涕泣伐桑柘
豈知還復有今年酒肉如山賽春社吏不到門人晝眠
老禪安樂如登仙縣前歸來傳好語黃紙續放身丁錢

四月一日夜漏欲盡起坐達旦

春歸不可留斗柄已崢嶸老至不可却雪鬢森千莖少
年所讀書廢忘如隔生舊交死欲盡存者萬里程高談
無與發欲語輒吞聲悠悠一飽計泯泯千載名逝將山
丘歸不見河碓清挑燈坐待旦攬筆衰涕傾

蓬萊行

山峭挿雲海樓高入煙霄不知何宮殿東望鬱岩嵬是
時青童君初散通明朝風濤中破裂涌出黃金橋授我
玉芝房服之塵念消凡骨一朝換八極坐可超

馮縣丞挽歌詞

綱字仲柔

尊公同故里季父接周行晚憲烏衣巷重逢玉樹郎名
流多賞識榮路正騰驤愁絕河梁上風煙草莽蒼

幽居初夏

湖山勝處放翁家槐柳陰中野徑斜水滿有時觀下鷺
艸深無處不鳴蛙籜龍已過頭番筍木筆猶開第一花
歎息老來交舊盡睡餘誰共午瓯茶

又

藤冠艸屨病支離門外紛紛百不知解籜有聲驚倦枕
飛花無力點清池閒思舊事惟求醉老感流年只自悲
綠樹陰中紅練起一團零亂溼臙脂

長歌嫋嫋挿秧天小繖颺颺入市船高棟巢乾初乳燕
綠槐陰密已鳴蟬只言末俗人情惡未廢先生日晏眠
推枕起來閒弄筆銅蟾手自挹寒泉

又

鬢毛禿盡齒牙疎難受人間折簡呼詩酒本來無藉在
形骸況復不枝梧槐陰漸密能鄣日池水新生可浴兒
移得太行終亦死平生常笑北山愚

出蜀十九年故交零落殆盡慨然有作

西遊邂逅得諸君落筆千言酒百分聚散亦知元有數
死生豈料不相聞平羌空憶吟江月小益何由度棧雲
一事與君聊自慰兒曹或可付斯文

憶天彭牡丹之盛有感

常記彭州送牡丹祥雲徑尺照金盤豈知身老農桑野
一朶妖紅夢裏看

五月七日夜夢中作

征行過孤壘寂寞已千年馬病霜菅瘦孤鳴古冢穿煙

塵身欲老金石志方堅零落英雄盡何人共著鞭

又

霜露薄貂裘連年塞上留蘆笳青冢月鐵馬玉關秋振
臂忘身憊憑天報國讐諸公方衮衮好運幄中籌

急雨

急雨清風發土香靈臺如受寶犀涼華胥一枕蘧然覺
却聽蟬聲送夕陽

夜中步月

夜半不成寐起尋微月行風生驚葉墮露重覺荷傾兀
兀酒中趣悠悠身後名興闌還掩戶坐待日東生

晨起

齒豁不可補髮脫無由裁清晨明鏡中老色蒼然來餘
年亦自惜未忍付酒杯抽架取我書危坐闔復開萬世
見唐堯夔龍獲親陪寥寥三千年氣象挽可回豈以七
尺軀顧受世俗衰道在無不可廊廟均蒿萊

枕上聞布穀聲

老去惟思日月遲更堪青鬢總成絲無端催取流年去
最恨溪頭布穀兒

雨夜

北風吹雨亂疎鐘
簌簌燈花破碎紅
孤夢正行天一握
高城俄報鼓三通
衰遲空抱屠龍技
豪俊誰收汗馬功
但願輿圖早來復
白頭敢望起雲中

孤雲兩角去天一握
蓋褒斜道上也

焚黃

啼呼梨棗憶兒時
駒隙頻經日月馳
早歲已興風木歎

餘生永廢蓼莪詩燎黃恩重空垂泣戴白身存敢自期
足蹇僅能成拜起籃輿歸路不勝悲

卽事

陶令常耽酒龐翁不出家安貧炊麥飯省事嚼茶芽地
滿浮雉鴨庭荒噪渴蛙詩成賞音絕自向小兒誇

失鷓鴣

不見池邊整羽衣繞村散覓走羣兒卑飛正恐為人得
徑去何須報我知久憶蘋洲應自喜尚餘菰米亦堪悲

放翁未到忘情處日暮憑欄獨詠詩

贈童道人蓋與予同甲子

吾儕之生乙巳年達者寥寥窮比肩退士一生藜藿食
散人萬里江湖天忍貧不變我自許挾術自營君豈然
一事尚須煩布策幾時能具釣魚船

方謀買一小舟未得也

上方鈷老求宿蘆詩宿蘆蓋所寓室名以其似漁
舟也

一曲亭前水接天放翁短棹弄風煙宿蘆縱有江湖趣

猶是人間蜃釣船

夜坐園中至夜分

岸巾閒倚胡牀坐步屨還扶拄杖行漸近秋清知病減
盡捐世累覺心平翻翻雙鵠風枝爽熠熠孤螢露艸明
更欲裴回盡幽興麗譙傳漏報三更

六月二十四日夜分夢范至能李知幾尤延之同

集江亭諸公請予賦詩記江湖之樂詩成而覺忘

數字而已

露箬霜筠織短蓬飄然來往淡煙中偶經菱市尋谿友
却揀蘋汀下釣筒白菡萏香初過雨紅蜻蜓弱不禁風
吳中近事君知否團扇家家畫放翁

晨起

月澹如將曉風清喜近秋狂吟詞跌宕新沐髮颼颼桐
葉危先墮蟬聲斷更邁達生隨處樂自笑替人愁

村飲示鄰曲

七年收朝迹名不到權門耿耿一寸心思與窮友論憶

昔西戌日辱寇氣可吞偶失萬戶侯遂老三家村朱顏
捨我去白髮日夜繁夕陽坐溪邊看兒牧雞豚雕胡韋
可炊亦有社酒渾耳熟我欲歌四座且勿喧卽今黃河
上事殊曹與袁扶義孰可遣一戰洗乾坤西酌吳玠墓
南招宗澤魂焚庭涉其血豈獨清中原吾儕雖益老忠
義傳子孫征遼詔儻下從我屬索鞬

醉歸

十畝春蕪手自犁瓜牛廬在鏡湖西禪心每笑彈碁局

道眼長捐刮膜篦絕食就官分鶴料無車免客笑雞栖
頃獨有一竹輿今亦壞矣旗亭酒賤秋風近夜夜歸來醉似泥

二愛

并序

陶淵明詩云孟夏艸木長遶屋樹扶疎衆鳥欣
有託吾亦愛吾廬孟東野亦云遠岸雪難算勁
枝風易號霜禽各嘯侶吾亦愛吾曹予暇日詠
二詩有感作二愛詩

結屋不袤丈著身還有餘破壁作小窗亦足陳吾書無

酒當飲水無肉當飯蔬知止乃不殆此語良非虛古人
造道處正自無絕殊願君勿它求且復愛吾廬門外秋
水深日日集鷗鷺是豈相與期正以同類故殘年過七
十朋舊半丘墓非吾濟世心歎息莫予助人生非金石
去日如脫兔三復東野詩獨立悲歲暮

蜻蜓浦

舍北蜻蜓浦新秋偶一來菱絲煙際老芡背露中開漁
火明還滅沙禽去却回吾行興無盡舟子莫相催

題韓運鹽竹隱堂

茂卿字立道

鄴下王孫今勝流相逢三伏凜生秋未嘗一日可無竹似是前身王子猷

又

塵埃車馬日駸駸誰解從君一散襟待我清秋有閒日抱琴來寫萬龍吟

又

靜處知君解策勲爐香裊裊起微雲岸巾不住尋青士

欹枕還應對墨君

哭杜府君

叔高初過我風度何玉立超然衆客中可慕不待揖入
都多賓友伯高數來集質如琮璧潤氣等芝蘭襲晚乃
過仲高午日曠行笠忽忽遽別去悵望空快悒有如此
三高青紫何足拾豈無知之者相視莫維繫窮魚雖相
憫可媿吐微涇亦知尊公賢何止蓋鄉邑向風每拳拳
識面真汲汲秋風忽聞訃執書歎以泣造門不自決追

悔今何及又聞著書富手澤溢巾笈哀毀要無益遺橐

勤綴緝

初秋夜坐

徂歲又如許吾生真若浮露蟬鳴達曉風葉墮先秋野
迥星辰大天空河漢流胡牀幸亡恙且復寄悠悠

宴坐自午至暮

身外寥寥掃怨恩胷中浩浩納乾坤飽經世事常高枕
慣見人情不署門孤日夜分生海底百川秋漲沂河源

珥貂碧落從來事東訪蓬萊不足言

舟中詠落景餘清暉輕橈弄溪渚之句蓋孟浩然

耶溪泛舟詩也因以其句為韻賦詩

獨鶴還故鄉巋然但城郭出門無與遊所至苦寂寞裏

飯事幽討此計殊不惡薄算宿漁家蒼煙帶墟落

又

維舟入谷口信步造異境隔籬雞犬聲滿地梧楸影瓦
甌炊香稻石泉汲新井人間苦逼仄愛此須臾景

又

老圃髮如霜見客能廢鋤與坐使之年自云八十餘老
身六朝民艸舍數世居力守遠祖言一字不學書

又

沿溪得茅店酒旗出柴荆杖頭錢已空一醉何由成主
人語鄭重手把甕面清勸我姑小留溪魚亦可烹

又

秦皇酒甕邊古有釣魚磯我來必竟日時挈雙鯉歸白

鷺真可人常先孤棹飛高詠江練句令人憶玄暉

又

鏡湖三百里風止鏡面平持以照吾心俗塵安得生散
髮鷗鷺間萬事秋毫輕誰能拂東絳寫我孤舟橫

又

朝發雲根寺算宿煙際橋冷螢溼不飛潛魚驚自跳菱
船歌裊裊荻浦風蕭蕭平明宿鳥起我亦理歸橈

又

古祠照滄波老木闊雲洞輕舟不搖櫓正用一風送汲
井漱甘液掃榻寓幽夢所恨山未深城笳聽三弄

又

禹穴探斷簡樵風泛清溪倒影森松桂遊船散鳬鷺塵
中有異境十里青玻瓈高墮忽招人湖邊日未低

又

溪行已清秋還舍尚殘暑天公為解圍簾攏過疎雨青
蔬喜小摘紅粒亦新杵一飽坐北軒蘋花泣煙渚

劍南詩稿卷三十四